




OFFICE OF THE SPEAKER
OF THE LEGISLATIVE ASSEMBLY

P.O.Box: 1866, APIA, SAMOA - T: Office: (685) 31002 - M: (685) 7727832
Email: taeu.masipau@palemene.ws W: www.palemene.ws



9 Mati 2022

Hon. TUILAEPA Lupesoliai Dr. Sailele Malielegaoi
TAITAI – ITU AGAI

MATAUPU:

KOMITI SUESUE FAAPITOA A LE PALEMENE
TULAFONO O FANUA MA SUAFA 2020

Malo le soifua manuia ma le lagi e mama
E talitonu o lo o manuia lau Afioga i le Taitai o le Itu Agai.

Ou te faafetai atu mo lau Tusi o le aso 9 Mati 2022 ua ou taulimaina, e uiga i le mataupu ua taua i luga.

Ou te tali manino atu e faapea:-

O lo o tumau pea le amanaia e lo'u tagata o lo'u valaauina i le Tofi o le Fofoga Fetalai, ma o lo o o'u malamalama lelei foi i tulaga uma e tausia ai le taualoa ma le mamalu o le Palemene, i le faatuatuaga o le Fono Aoaofaitulafono ua tuuina mai ia te au;

O le galuega ua tuuina atu i le Komiti Suesue Faapitoa a le Palemene, sa faavae i le Lafo na faamaonia e le Fono Aoaofaitulafono, e aofia ai ma Sui Usufono ua filifilia iai mo lea galuega;

O lea foi galuega, na matua manino lava la'u Folasaga i le Maota faapea le Saunoaga a le Afioga i le Tamaitai Palemia, mo le silafia e le Maota ma le atunuu, i le agaga na naunauta'i ai e faatino. E leai ma se agaga e toe faitau mai ni futia ua sola ma le galuega sa faatino e le Komiti sa iloiloia ia Tulafono i le Paeaiaga ua tuuina atu;

Ou te malamalama lelei foi i le 2/3 e pei ona taua. Peitai, e ese le agaga o lo o e aumaia, ese le agaga o le galuega o lo o faatinoia nei. O sasi foi o le Auaifaluga e pei ona e toe faailoa mai, e le tatau ona e faauigaina o **nai mea laiti**. Afai ua faatamala lau Afioga o Le sa Minisita o le Ofisa o le Fono i le taimi o nei faafitauli, e tatau ona aumai lou faatuatuaga i le galuega lelei ma le amiotonu, ua faagasolo nei. E leai foi ni auala Faa-Palemene o iai, e foia ai le faafitauli ogaoga ua tulai mai;

O lou toe taua o le suafa o le Sui Fofoga Fetalai i sona finagalo sa faaalii i Faatalanoaga Faalauaitete ma Iloiloga sa faatino e le Komiti na iloiloia nei Tulafono i lena Paeaiaga, e tasi lea aiaiga taua sa tatau ona puipui malu iai lena Komiti ma lau Afioga, ia Faalilolilo molimau e tuuina atu i luma o Komiti Faa-Palemene, e tusa ma aiaiga o Tulafono Tumau a le Palemene. O lea foi la ua tau vavala mai, sa le i malupuipui aia tatau a tagata lautele sa auai atu i taualumaga a lena Komiti mo latou finagalo faaalii;

O le auai atu o le Susuga Auapaau Aloitafua Mulipola i le Komiti i lena vaitau e pei ona e taua, o lona lava lena tulaga faa-tagata lautele o le atunuu. O faiga faa-Temokarasi moni na. E iai avanoa mo finagalo faaalua o tagata lautele e faufau ai a tatou Tulafono ma Tonufai mo le manuia o le atunuu;


E le tatau foi i se Sui Usufono Matua e pei o lau Afioga ona e faapea mai “**e asa le faiva ae lē asa masalo**” i le alofaiva o le Taitaifono o le Komiti Suesue Faapitoa a le Palemene. O le galuega tatou te galulue faatasi ma tatalo faatasi iai mo le manuia o Samoa, peitai e matau atu e foliga e faamuamua i lou finagalo faiga faa-Vaega Faaupufai e saili ai se auala e tilofia ai le galuega fita a le Komiti, o le Palemene lava lea. O so o se mataupu ua iai se Faaiuga a le Fono Aoaofaitulafono, o tatou uma lava e ana lea Faaiuga. E tatau lava foi ona tatou tausisia ma tapuaia;

Ou te teena lou faapea mai e sui le Taitaifono o le Komiti Suesue Faapitoa o lo o galulue nei i le galuega ua tuuina atu iai e le Palemene. E le tosina gofie sa’u Faaiuga i se mea e le amiotonu ma e solia ai tulaga aloaia o le Fono Aoaofaitulafono. Ou te ofo foi i lou le silafia, e le mafai e le Fofoga Fetalai ona sui se Faaiuga ua uma na ioe iai le Palemene. O le Tofiga o le Taitaifono, sa faamaonia e le Fono Aoaofaitulafono. E na o le Fono Aoaofaitulafono foi e faia se Faaiuga faapea i se mafuaaga tatau ua faamaonia e tatau ai ona fai. E le sosofaina foi i sou finagalo toatasi se mea ua ioe iai le Fono Aoaofaitulafono. O itu foi ia e atagia ai le le tapena o la outou Vaega Faaupufai i taimi o a tatou taualumaga. Afai sa e toesea, sa tatau ona tou feutagai ma faaleo mai e la outou Vaega ni finagalo faapea i le aso na faatu ai le Lafo. Peitai, ai toeitiiti uma le galuega a le Komiti, ae o lea faatoa maua sou finagalo;

O lou finagalo e faapea e le agavaa le Afioga i le Sui Fofoga Fetalai i le tulaga o le Taitaifono o le Komiti Suesue Faapitoa, ou te le taliaina. I lo’u tulaga o le Fofoga Fetalai, e agavaa Sui Usufono uma i so o se tofiga e faamaonia e le Maota. E augata tele lo’u tagata e fai se faamasinoga sese e faasinosa lima ai i Sui Usufono Mamalu e faapea, o ai ua agavaa, a o ai e le agavaa. O Tofiga uma e mai le Atua. E agavaa uma foi so o se tagata ua tofia ma filifilia e le Atua i so o se Tofiga ua ia finagalo iai. A o lo tatou tiute e fai faatasi, o le tatalo mo so o se valaauina;

E lagona lava lo’u faanoanoa i saunoaga tau faamata’u a lau Afioga e faafefe mai ai le Fofoga Fetalai ma le Palemene i le ono oo atu o lena mataupu i le Faamasinoga. O lena ua ou faamanino atu. Ae na ona ou faamanatu atu, ua matua lou soifua i Upufai o lo tatou atunuu. O se uiga le faaaloalo lea tulaga. Sa ou manatu tele o lau Afioga e taualamua i le tausiga o le mamalu o le Nofoa ma le Palemene. Peitai, e ese le mea o iai lou finagalo. E le soona faafefeina foi e sesi le Fofoga Fetalai ma le Palemene mamalu a le atunuu. O le tuualalo alofa, seu le manu ae tagai i le galu.

Ma lo’u faaaloalo tele



Hon. PAPALII Li’o Oloipola Taeu Masipa’u
FOFOGA FETALAI

Kopi: Afioga i le Tamaitai Palemia
 Afioga i le Sui Fofoga Fetalai
 Afioga i le Loia Sili